

Akhlak Mulia Cermin Solat Sempurna
24 Safar 1443H/1 Oktober 2021M

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ
سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا
عَبْدَهُ وَرَسُولَهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ وَأُوصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah-mudahan kita diberkati Allah Subhanahu wa-Ta'ala di dunia dan akhirat.

Sidang Jumaat yang dirahmati Allah Subhanahu wa-Ta'ala

Agama Islam mementingkan soal akhlak dalam kehidupan seharian. Akhlak bermaksud budi pekerti, kelakuan atau tingkah laku yang baik. Agama tanpa akhlak diibaratkan seperti jasad yang tidak bernyawa. Allah Subhanahu wa-Ta'ala menyatakan kemuliaan akhlak Nabi Sallallahu 'Alaihi Wasallam melalui firman-Nya dalam surah al-Qalam ayat 4:

أَعُوذُ بِاللَّهِ مِنَ الشَّيْطَانِ الرَّجِيمِ

وَإِنَّكَ لَعَلَىٰ خُلُقٍ عَظِيمٍ ﴿٤﴾

Yang bermaksud: *Sesungguhnya kamu wahai (Muhammad) memiliki akhlak yang mulia.*

Memiliki akhlak mulia merupakan kunci kepada kebaikan hidup di dunia dan akhirat. Malah ia juga penting dalam membina kehidupan beragama, bermasyarakat dan bernegara. Oleh yang demikian, menghiiasi diri dengan akhlak mulia adalah dituntut dalam Islam. Ini bertepatan dengan Sabda Nabi Sallallahu ‘Alaihi Wasallam dalam hadis yang diriwayatkan oleh Imam Ahmad:

Yang bermaksud: *Sesungguhnya aku diutus untuk menyempurnakan akhlak yang mulia.*

Sidang Jumaat yang dirahmati Allah Subhanahu wa-Ta’ala

Iman dan akhlak saling berkait rapat. Seseorang mukmin itu dinilai sempurna imannya disebabkan oleh kemuliaan akhlaknya. Rasulullah Sallallahu ‘Alaihi Wasallam bersabda dalam hadis yang diriwayatkan oleh Imam Al-Tirmizi:

أَكْمَلُ الْمُؤْمِنِينَ إِيمَانًا أَحْسَنُهُمْ خُلُقًا

Yang bermaksud: *Seorang mukmin yang paling sempurna imannya adalah yang paling mulia akhlaknya.*

Melalui hadis ini dapat kita simpulkan bahawa akhlak yang baik adalah akhlak yang berdasarkan keimanan yang benar kepada **Allah**.

Manakala iman yang benar pula adalah iman yang mampu mendorong seorang mukmin itu untuk berkelakuan baik dalam setiap tindakannya.

Seseorang yang memiliki akhlak yang baik juga sering dikaitkan dengan ibadah solatnya yang sempurna kerana antara falsafah ibadah solat itu ialah ingin melahirkan seorang individu yang baik hatinya, terdidik anggotanya dengan kebaikan, memupuk semangat hidup bermasyarakat, patuh kepada pemimpin dan lain-lain lagi. Oleh itu, marilah kita bersama-sama mengajak keluarga dan masyarakat Islam keseluruhannya supaya berakhlak mulia agar menjadi contoh kepada bukan Islam, bukan kita berterusan mengambil contoh daripada mereka seperti meletakkan kenderaan pada tempatnya supaya tidak mengganggu laluan orang ramai khususnya jiran tetangga.

Marilah kita bersama-sama berusaha untuk menanamkan sifat-sifat terpuji dalam diri kita, anak-anak kita, kaum keluarga kita, saudara mara kita, sahabat handai kita serta seluruh generasi masyarakat kita dengan mencontohi akhlak Baginda Nabi Sallallahu ‘Alaihi Wasallam kerana Allah Subhanahu wa-Ta’ala sangat menyayangi hamba-Nya yang berakhlak mulia.

Firman Allah Subhanahu wa-Ta’ala dalam surah Al-ahzab ayat 21

أَعُوذُ بِاللَّهِ مِنَ الشَّيْطَانِ الرَّجِيمِ
لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا اللَّهَ
وَالْيَوْمَ الْآخِرَ وَذَكَرَ اللَّهَ كَثِيرًا

Yang bermaksud: *Demi sesungguhnya, adalah bagi kamu pada diri Rasulullah itu contoh ikutan yang baik, iaitu bagi orang yang sentiasa mengharapkan (keredaaan) Allah dan (balasan baik) hari akhirat, serta ia pula menyebut dan mengingati Allah banyak-banyak (dalam masa susah dan senang).*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ
مِنَ الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ
السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي
وَلَكُمْ، وَلِسَائِرِ الْمُسْلِمِينَ وَ الْمُسْلِمَاتِ، وَ الْمُؤْمِنِينَ
وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.